



# LOU BRUSC

JOURNAU POUPULARI DE LITERATURO, D'ISTORI E DE SCIENCI  
PAREISSÈNT TOUTEI LEI DIMENCHE

Depausitari majourau pèr Marsiho : carriero Canebièro, 4. En vendo pertout.

Abounamen :

SET franc pèr an pèr touto la Franco.  
Fouero Franco, lou port en subre, ço  
que revèn à DES fr.

Tout ço que toco lou journau dèu  
èstre manda afranqui à l'Empremarié  
Prouvènçalo, 15, carriero d'ou Grand-  
Relogi, à-z-Ais.

Les annonces, réclames et faits di-  
vers sont reçus exclusivement à la  
Société Anonyme de publicité, 52 rue  
d'Aboukir, fermière de la publicité.

## TAULETO

PASSO - TÈMS. — Grafnado - *L. B.*  
POUESIO. — Moun Album : Lou Mistrau - *Louis Astruc.* — Tistet Bouissoun - *Marius Bourrelly.* — A Vitor Hugo - *A. Miquèu.* — La cinquanteno - Au Tambourinaire - *F. Vidal.*  
REMEMBRANÇO. — D'ou 6 au 12 de Mars — *L. A. Gardaire.*  
CRONICO. — La Felibrejado en l'ounour de Tistet — La fèsto de Victor Hugo à Soumèire : Discours de *Marius Girard.*

## PASSO-TÈMS

### GRAFIGNADO

Vai-t'en querre fouieto,

Disiè Jan Crocomor à sa fremo Nanoun.  
— A vira l'ue Fifino ? Es-ti mort Jèjé ? — Noun.  
Fai rên : vendra lèu d'obro. — E perqué ? — Catineto  
Pèr soun ome a souna lou medecin Rèimoun.

L. B.

## POUESIO

### MOUN ALBUM

IX

### LOU MISTRAU

Sa voues largo a'n resson coume lis epoupiè  
E dins sis ourlamen l'on crèi de destriha  
Li chaplachou qu'autan faguèron esbriha  
Tant de ferre au souleu ! Sa grandè voues coungreïb

Dins li cor l'amour d'ou Païs ; fai regreia  
En pleno majesta, coume mort de la vèio,  
Li troubadou cubert de gl'ori e de daurèio  
Largant un serventès, lis iue tout esglaria.

Èu es lou verbe, èu es la voues de la Prouvènço,  
Lou testamen di mort, l'espèr de la jouvènço ;  
De nòsti remembranço es èu lou clar mirau.

Oh ! bramo, bramo maï, bramo euca, bramo sèmpe !  
Que dins lou meme sen toun rampèu nous asèmpe,  
Que dins lou meme amour nous ligues, o Mistrau !

Louis ASTRUC.

## TISTET BOUISSOUN

AIR : Allons chasseur, vite en campagne

Anèn Bouissoun, prèn ta masseto,  
Bassèlo sus lou tambourin,  
Pan, pan ! pan, pan ! bouto nous en trin.  
Fai resclanti ta flahueto  
De cant novèu, de gai refrin,  
Enjusqu'à deman matin.

Siés lou rèi dei tambourinaire  
E manejès lou galoubet,  
Chi, chièu ! chi, chièu ! que s'outo tei det  
Dirias qu'es un merle siblaire  
Qu'au bouès largo de soun siblet  
Leis er lei pu poulidet.

Li a que lei terro de Prouvènço  
Pèr coungria d'ome de toun pèu ;  
Pan, pan ! pan, pan ! sout noueste soulèu ;  
Li pousson pas pèr escassènço,  
Seï rai leis espandisson lèu  
De mai en mai que pu bèu.